

## Putnengia – casti e ruina

Excursiun allas ruinas dil casti da Putnengia e sils fastitgs da Pieder de Puntengia e dalla fundaziun dalla Ligia Grischa avon 600 onns.

### Tujetsch alla fin dil 12avel tschentaner

#### *Emprema staziun e partenza*

#### *Transit e vias*

#### *Punt veglia sul Rein da Giuv*

La via atras la val e sul cuolm sesparteva cuort suenter Dieni en duas direcziuns e quei fuvan la via da funs (sco oz) en sur Selva – Tschamut – Pass Alpsu e la via suren sur Milez – Scharinas - Val Val – Pass Tiarms – Pass Alpsu.

#### *Treis punts*

Ina punt veglia en quei liug ha carteivel adina existiu ed ei stada en diever pil traffic atras la val entochen igl onn **1863**. La punt nova directamein dasperas ei vegnida construida igl onn **1863**. In tschancun plinensi ei la punt dalla Viafier Furca Alpsu oz Matterhon Gottard, ch'ei vegnida eregida igl onn **1915**.

#### *Ir anavos el vargau*

- Il clima fuva avon 800 onns bia pli migeivels ed il cunfin d'ual s'extendeva sin quasi 2400 m.s.m. Il Pass Alpsu era cuvretgs cun uaul. La Gasetta Romontscha dils 19 da settember 1889 rapporta: Sill'Alpsu, nua ch'ils Uranès cavan turba, ei vegniu anflau sut ina sdrema turba d'in metter altezia in larisch da 50 centimeters el diameter, che veva 350 tscherchels annuals. Best e frastgas erien bein conservai.

- La vart dretga fuva cuvretga cun uauls extendi, quasi so oz.

- Ils uauls dalla vart seniastra han ils avdents dalla val decimau el decuors dils tschentaners. La midada ei sefatga igl onn **1853** cu in stregn regulativ pil diever digl uaul ei vegnius cumandaus dil cantun.

- A Sedrun vegn igl empren sanctuari eregius entuorn **1200**. Egl urbari da **1456** dat perdetga da quei eveniment e noda sut il datum dils 26 da zercladur: «*Anno domini M<sup>o</sup> CC<sup>o</sup> V<sup>o</sup> [=1205]. Nota quod dedicacio huius ecclesie Tifesch celebratur semper in dominica proxima post festum sancti Vigili episcopi et martyris*», vul dir che la dedicaziun dalla baselgia da Sedrun crodi sin ils 26 da zercladur, la fiasta da s.Vigeli.

- L'emprema caplutta ella val ei documentada en in document digl onn **1368**, numnadamein a Flurin-Sura sur Rueras. Ella ei carteivlamein daventada l'unfrenda d'ina bova ni lavina.

- Igl onn **1491** retscheivan ils vischins da Rueras lur caplutta.

- El 16avel tschentaner vegnan las capluttas da Tschamt (hospezi) e Camischolas baghegiadas

- El 17avel vegnan tschun capluttas construidas e la parochiala reconstruida igl onn **1691**

- Treis autras capluttas vegnan baghegiadas el **18 e 19avel** tschentaner.

#### **Secunda staziun**

#### **Colonisaziun dalla val**

- L'urbarisaziun seconcentrescha sil temps mediaval. La val ei vegnida colonisada essenzialmein dil temps medieval tumpriv (**476 – 1000** s. C.) entochen il temps medieval tardiv (**1250 - 1500** s. C.), quei vul dir, ils vitgs el vonn grond dalla val da Dieni a Bugnei denter il **9 e 12avel** tschentaner.

- Il territori el vest dalla val, dadens igl uaul Tschuppina (Dadains gl'Uaut), il secund vonn da Selva ed il tierz vonn (Prau Mulins/Mühlematt) da Tschamut culs aults da

suro vegnan colonisai el **12/13avel** tschentaner (Caspausa, Planatsch, Scangleras, Mulinatsch, Giuv. ...)

- La cultura da viver fuva quella dils hofs, beins, uclauns e vitgs. El **17 e 18avel** tschentaner bandunan ils habitonts ils numeruas uclauns e secasan giu els vonns dalla val, ella vischinonza dalla via dalla val ed ella vischinonza da capluttas e baselgias.

Diember da habitonts avon rodund 700 onns po esser staus denter 300 e 500, oz cun 11 vitgs ed uclauns dumbra la val rodund **1200** habitonts indigens.

### *La situaziun historica da Tujetsch*

- Ei dat negins fastitgs prehistorics

- Drusus e Tiberius digl Imperi Roman, conquistan sin camond dad imperatur Augutus, la Rezia igl onn **15** avon Cristus.

- Ella val dat ei neginas perdetgas dalla preschientscha dils Romans. La traversala ost vest fuva buca impurtonta pils Romans en cumparegliaziun cun las ruttas da sid el nord e cuntrari el Grischun sco el Valleis.

### *Documentau*

- L'emprema menziun dalla val ei igl onn **1205** cun la baselgia da s.Vigeli a Sedrun egl Urbari dalla pleiv da **1456**

- La vischnaunca ei l'emprema gada documentada en in document da **1237** entras in «Willhelmus» da Tujetsch sco perdetga. (*Die ersten urkundlichen Belege für das Tujetsch sowie auch für das Urserental stammen aus dem 13. Jahrhundert. 1237 ist ein „Willihelmus de Tiuesch“ erwähnt in Bündner Urkundenbuch II, S. 211. „Willihelmus“ ist Zeuge in einem Gütertausch des Klosters Disentis mit dem Kloster Rüti. - Martin Bundi- Zur Besiedlung der obersten Stufe des Vorderrheintales, 1999*)

- Ella val habitavan ils subdits dalla claustra, ils emprems colons ed ils libers che s'udevan giuridicamein alla cuminonza dils Libers da Laax.

Sedrun daventa il liug principal dalla val cun la baselgia parochiala e cul santeri per l'entira vallada. La val ha adina formau ina cuminonza, ina vischnaunca dils "vicini de Tivez", ils vischins da Tujetsch. Treis historiografs fan valer che la vischnaunca cun vischins seigi docuemntada igl onn **1325** «vicini de Tivez». In precis document che giustifichescha historicamein quei datum dat ei deplorablamein buc.

Il vitg da Rueras fuorma beingleiti il secund grond vitg cun sia caplutta da **1491**. Dil temps dil casti da Putnengia e gia avon fuva Rueras in Meierhof per la claustra da Mustér. Leu viveva il «meier», la persuna ufficala dalla claustra per incassar la dieschma dils subdits. Ils libers purs ella val che stevan sut la giurisdicziun dils Libers da Laax fuvan libers dalla dieschma.

Igl onn **1368** plaida in document digl εμπrem mistral dalla Cadi, numnadamein Ulrich Barlodt da Mustér. Il process per dapli libertad fuva en cumplein moviment ed aschia era l'entschatta dalla deliberaziun dalla dieschma. Las alps da Tschamut, Val Val e Val Giuf ein tochen **1861** stadas en possess dalla claustra.

### **Tiarza staziun**

#### **Documentaziun dalla val**

L'entschatta d'ina documentaziun dalla val dat pader Placi a Spesch gia igl onn **1806**. Sia descripziun dalla val ei grondiusa e da gronda valeta per la val, sche buc il

meglier ch'ei dat inumma. En sia descripziun ha el risguardau tuttas spartas pusseivlas dalla val: historia, fauna e flora, il sistem politic, ils habitonts, ... .

La publicaziun historica «Die Talgemeinde Tavetsch 1898» da Giachen Hasper Muoth presenta 66 vitgs, uclauns e beins che fuvan zacu habitai sigl intschesch dalla val. El interpretescha e giudichescha numerus documents dalla val.

Pader Baseli Berther da Dieni, cuntinuescha da nudar la historia dalla val all'entschatta dil **20avel** tschentaner. Sco indigen ha el giu ses avantatgs ed ins ha legiu el fetg stedi.

Ei suondan in Walter Leeman, Walram Derichsweiler, ils onns **1990** Guido Decurtins e Gieri Venzin cun aunc biars auters entochen al di dad oz.

Tujetsch ei ina dallas vischnauncas grischunas ch'ei documentada grondiusamein.

### **Embrugls ed eveniments guerrils en vischinonza dil casti**

Igl onn **1333** ha giu liug in cumbat dalla claustra Da Mustér encunter ils Uranès sil Pass Alpsu. Leu ha giu liug ina battaglia tenor il sistem da Morgarten giud las spundas dalla Vagliauna.

La situaziun da quei temps: *Igl onn 1323 occupeschan ils Uranès Ursera. Ei suonda in camond digl avat e signurs da Sax-Mesauc als d'Ursera da bloccar la via sul Gottard. La claustra sepeina per ina uiara per survognir anavos Ursera. Truppas digl Uri, ils da Vaz e Confederai cumbattan la truppa dalla claustra sil Pass Alpsu igl onn 1333. La claustra ed ils alliai piardan 200 (autras fontaunas 500) schuldada, ils Uranès mo 50 vulnerai. Il capitani dalla claustra ha stuiu vegnir cumpraus libers per 1000 funs.*

Igl atun digl onn **1936** ei vegniu anflau muneidas en tschaler dalla casa da Duri Battesta Venzin a Rueras sper baselgia. L'anflada ei documentada sut „Münzfund von Rueras“ cun 4 muneidas d'aur e 25 d'argien. Las quater muneidas las pli impurtontas e da valeta ein:

- Treis flurins d'aur (Florentiner) dil **14avel** tschentaner. Ils segns, seniester dil tgau da sogn Gion, muossan la battida dil
- (1) meisterculader Lapo di Ghino, **1310**, emprema mesadad;
- (2) da Tano Baroncelli, **1313** e da
- (3) da Donato dell'Antella, **1327**

La tradiziun rauenta ch'in cussadent da quella casa hagi stuiu serender al cumbat sil Pass Alpsu ed hagi avon ch'ir zuppau sia facultad el mir da siu tschaler. El ei carteivel buca returnaus ed ils ses veva el buca giu informau dil lagungn dil scazi.

Igl onn **1799**, ils 6 da mars, succeda, cun l'invasiun dall'armada franzosa, la pli tragica historia da sisum la Cadi.

Il crapun sil crest el nord dil casti veva buca schurmegiau avunda il Giachen Martin Berther ed el vegn tuccaus mortalmein d'ina balla dils Franzos ils 6 da mars **1799**. El ei aschia l'emprema unfrenda dalla Cadi els cumbats encunter ils Franzos.

La retenida e battida dils Franzos el cumbat a Cons a Mustér ha la finala enormas consequenzas per la populaziun da Sur- e Sutsassiala. Cun la battaglia a Domat sto Tujetsch notificar 17 morts e lu aunc pagar e schar engular rauba en la summa totala da 450'00 flurins. La claustra e tut sia historia daventa in'unfrenda dallas flommas – era la nosa.

Dils Embrugls grischuns (**1607/18 – 1639**) ei Tujetsch staus schurmegiaus. Gieri Genatsch, il herox da quei temps, ha inaga dapli stuiu scappar igl onn **1630** da ses inimitgs e quei dalla Surselva si tochen en Tujetsch per da leu vuler fugir sul Pass La

Crusch vi egl Uri. Avon l'arrivada sil pass eis el denton vegnius calmaus anavos. Sin tut quei moviment guerril e silla smanatscha dalla reformaziun ha Tujetsch, sco era autras valladas sursilvanas, reagau cun baghegiar capluttas, aschia tschun ella val e reconstruiu da niev la baselgia parochiala a Sedrun – ina demonstraaziun massiva dalla vart catolica.

### **Quarta staziun**

#### **Igl access el casti, baghetgs, annexa, mir circumdont**

Documentaus vegn il casti per l'emprema gada igl onn **1300**. En quel ei era numnaus l'existenza d'in mir da segirtad entuorn il casti, il pli savens ei il grep vegnius duvraus sco mir da resistenza cun plazzar suren crappa che vargava ora il grep per engreviar il reiver suren.

*Entrada el casti digl vest viers ost:*

1. Il mir da schurmetg ei vegnius destruius entras las sondaziuns dalla NEAT ils onns **1970/1980**. Immediat suandava ina emprema entrada cun in portal.
2. Ei suonda in emprem foss da schurmetg e resistenza.
3. Puspei ina entrada cun in portal.
4. Suenter in pastget che surveva forsa sco iert ni piazza da sedivertir suonda il foss da schurmetg grond cun in mir ault e gies encunter il casti. Era cheu varga la crappa ora per impedir il reiver suren.
5. En quei pastget encunter vest en in pign fiép duess ina cistiarna sesanflar.
6. Suenter passar in punt movibla sul foss suonda l'entrada principala.
7. Dretg semuossa in emprem local che pudess ver surviu per las armas.
8. Il casti schai sin grep gliemaus dil glatscher giu dalla Val Giuv.
9. La tuor da habitar mesira circa 14 meters ed ei partida en 4 alzadas.
10. Ils mirs da crappa naturala mesiran giudem tochen 1.50 m. Sesalzond sesminuescha la mesira.
11. L'entrada principala ella tuor secatta ella fassada sid. Igl ei ina entrada buca usitada. Pil pli menava ina scala si ella secunda ni tiarza alzada e leu sesanflva il portal principal. En cass da disturbis guerrils era ei pusseivel da trer ad ault la scala ed impedir il rumper en.
12. Gest el sid dalla tuor semuossa ina annexa. Il diever da quella ei nunenconuschenta. Era in plaun pliengiu enviers sid sin in pastget sesanflan el nord mussaments d'in mir.
13. La fassada el nord muossa in pign tochet da ligiadira originala e treis ruosnas per tener quaders per ina annexa.

*Tgi ha construiu il casti?*

Senza dubi fuvan quei specialist che serendevan sin damonda ed engaschi da liug tier liug ed eregevan il casti sin gaivisch dils signurs proprietaris. Ils habitonts dalla val, ils subdits, stuevan silpli segidar cul transport da crappa e sablun, lenna e cun furnir la caltschina.

*Enteifer tgei temps ei il casti staus habitaus?*

L'emprema menziun dils signurs da Putnengia succeda igl onn **1252** cun Wilhelmus de Putnengia. Il casti sez vegn menziunas per l'emprema gada el document da **1300** „ante castrum Bultringen“. Il casti vegn dataus dils umens dil fatg d'entuorn **1200**. Il davos dalla schlatta Putnengia vegn numnaus **1515** en Lumnezia. Igl onn **1368** vegn gl'emprem mistral numnaus ed entras il process per dapli libertad svaneschan era ils signurs administraturs dalla claustra. Aschia ei il casti staus habitaus da quei da rodund 200 onns e dapi lu maglia la natira vid las miraglias historicas. Schebein il casti fuva habitaus sur onn ei grev da dir. En vesta d'in pli migeivel clima

ei quei stau pusseivel, regeva in traffic tras la val sur gl'entir onn ora e quei encunter vest sul Pass Alpsu ed encunter nord sul Pass La Crusch. Igl ei denton da conceder chil Pass Alpsu ha plitost giu ina muntada regiunala. Auter il Pass La Crusch che ligiava il nord e sid e quei entochen l'erecziun dalla Punt dil Giavel, numnada l'emprema gada igl onn **1306**.

Las entradas dils signurs da Putnengia formavan igl incasso da duana e la dieschma ch'il «meier» a Rueras (Meierhof) incassava pils signurs e per la claustra.

### **Tschunavla staziun**

#### **Famiglia de Putnengia**

La schlatteina feudala “de Putnengia” ei nudada l'emprema gada cun Wilhelmus de Putnengia igl onn **1252**. La famiglia da derivonza gualsra cun sedia a Mustér (Casti da Chischlatsch) steva en survetsch dalla claustra da Mustér sco administratur. Igl onn **1278** s'udevan Wilhelm de Putnengia e siu fegl Hugo tier quels nobels sursilvans che han agiu encunter la claustra. Ils onns **1339** e **1369** funcziunavan Hugo ed Ulrich de Putnengia sco mistrals ad Ursera sin territori dalla claustra da l'auter maun digl Alpsu. Igl onn **1391** fuva Heinrich de Putnengia administratur claustral. Gl'onn **1397** sigilescha Ulrich de Putnengia a Trun pil pievel dalla Cadi. Igl onn **1404** e lu danovamein igl onn **1438** ein commembers dalla famiglia mediatur. Carteivel entras ina letg possedevan ils de Putnengia era beins ella Lumnezia,

#### *Sia politica*

Ils onns **1402 – 1438** ei Pieder de Putnengia staus avat dalla abbazia da Mustér e porta sco emprem avat il tetel da prenci-avat (Fürstabt). El ha persequitau ina politica dalla pasch e d'agid vicendeivel. Cun siu sustegn ed engaschi persunal nescha ord la Ligia da Glion (era numnada da Ligia Sura) da **1395** la Ligia Grischa, ch'ei vegnida reafirmada a Trun sut igl ischi ils 16 da mars **1424**.

#### *Relaziuns digl avat Pieder cun Uri ed Ursera*

Avat Pieder intensivescha las relaziuns cun Uri ed il Pass Alpsu survegn aschia dapli muntada. Igl onn **1404** ei en in contract vegniu decidiu da segirar la diagonala Domodossola – Pass s. Giacomo – Gottard – Alpsu encunter enguladetschs ed assagls. La claustra veva grond interess per ina traffic garantiu e segir. Ad Altorf cumpra avat Pieder ina tuor. Denton vegn el buca dad engrondir massivamein sia influenza sin Uri. Il dretg da territori ch'el retscheiva per Ursera vegn limitaus igl onn **1407**. Il possess digl avat astgava buca vargar 500 glivras ed en cass da carplinas astgava el buca clamar dertgiras jastras. Igl onn **1410** s'uneschon ils d'Ursera cun Uri cun in contract da dretg da territori.

Cun l'engrondaziun dalla Ligia Grischa obtegn igl avat dapli pussonza e forza anovians. Igl onn **1425** engiran ils avdontas dad Ursera obedientscha agl avat. Quei cumin descriva Giachen Casper Muoth en siu epos il Cumin d'Ursera cun 525 lingias. Suenten l'elecziun dil mistral stueva quel surdar agl avat da Mustér in pèr vons alvs sco segn d'obedientscha. Ils tscheins han ils habitonts stuiu pagar vinavon ed il contract vala tochen igl onn **1649**. Quei onn secumpran ils Uranès libers da tuttas obligaziuns enviars la claustra. Regurdond vid quella part historia dad Ursera fa il mistral dad Ursera aunc oz part alla fiasta da s.Placi. Dil reminent san ils d'Ursera festivar igl onn 2025 il giubileum da 500 onns dapi igl impurtont cumin da **1425**.

#### *Cantada*

*Il cumin d'Ursera da 1425*

da Giachen Casper Muoth, Breil

Ina loscha cavalcada,  
Roscha ferma sco da guerra,  
Pass' ils trutgs de Val d' Ursèra :  
Segner Pieder de Pultengia,  
Igl avat de Desertina,  
Va a pêr cun Clau Camengia,  
Il massèr de glièut cumina,  
E mi giur de Hospental.  
Quels suonda Gion Pultengia  
Sco menader e mistral.  
Segner Pieder sin viadi  
Culla glièut dil vasalladi, -  
Cumpognaus da quater paders,  
Il capavels urentaders  
Dellas caussas e fatschentas  
Delicatas et urgientas,  
Pertgiraus dals campiuns,  
Sempels nobels e baruns.

...

*Davos fastitgs dalla famiglia*

Igl onn **1500** ei in Pontaninger sesents en Val Lumnezia ed igl onn **1515** ein Junker Hans Pontaninger e dunna Ursula cun mumma Tellya en Lumnezia.

### **Mumpe Medel ed ils nobels de Putnengia**

Ella brev dils 23 da schaner **1402** ei igl entir territori da Mumpé Medel en possess dalla famiglia ministeriala de Putnengia. Clausen de Putnengia fuvà il bab digl avat Pieder e Cilia, sia sora. Ils dus artavels, avat Pieder de Putnengia e sia sora Cilia partan il territori. Il bein encunter sera dalla Via Imperiala retscheiva Cilia, la quala venda sia part ad Uolrich Barlotta, mistral igl onn 1368 el vala sco emprem mistral enconuschent dalla Cadi. Igl avat Pieder retscheiva la part encunter damaun dalla Via Imperiala nua ch' il casti da Chischlatsch sesanflava. La parcella d' avat Pieder resta tochen **1846** en possess dalla claustra. Tenor scriver da Guglielm Gadola ei la sora d' avat Pieder de Putnengia stada la pli buna signura dil casti. Igl ei da gronda probabladad che avat Pieder e sia sora Cilia ein carschi si en quei casti.

Entras ierta d' avat Pieder de Putnengia ei il casti ius vi en possess dalla claustra da Mustér e sur ils onns ha il casti piars sia muntada. Ch' ei dat buca scartiras davart la muntada dil casti a Chischlatsch, ha probabel da far cun il fatg, ch' il casti era en possess dalla famiglia de Putnengia, ina famiglia ministeriala cun negina pussonza politica. Da quei temps eran las decisiuns politicas en cumpetenzza dil prenci avat dalla claustra da Mustér.

*Fontauna: G. Battista Manetsch en Mumpé Medel – ils Gualsers e lur historia, 2024.*

### **Sisavla staziun**

#### **Intern dalla tuor**

Cheu regia ina atmosfera ruasseivla ed ina energia emperneivla e cun empau fantasia san ins forsa sentir la historia vargada. Quei san ins era promover cun tucclar en la crappa dallas miraglias. Ina buna posiziun ei enamiz la tuor e sepudend esser persuls e la sera ni la damaun.

L' entrada ei vegnida reconstruida igl onn 2015.

Ils mirs giudem mesiran ina profunditad dad 1.20 – 1.50 m.

El funs dalla tuor schaian aunc aunc rodund 90 cm tratsch che savess aunc schar vegnir neunavon interessantas anfladas historicas.

Piras ruosnas els mirs e séms da crap indicheschan las quater alzadas.

El mir dalla fassada ost sesarva ina orva da sittar. Carteivel sesanflavan pliras da quellas en tuttas fassadas.

En la fassada viers nord semuossa egl ault ina finiastra ch'ei pli tard vegnida serrada si cun crappa.

### **Projects da sanaziun dil casti e sias ruinas**

Igl onn **1997** succeda la fundaziun dil Forum cultural Tujetsch FcT. Finamira principala dil FcT ei scochemai stada la perscrutaziun, sanaziun e reconstrucziun parziala dil casti da Putnengia. L'emprema etappa da lavur ei igl onn **1999**. Duront quella ein numerusas uniuns segidadas grondiusamein.

El decuors dalla secunda etappa succeda il megliurament dil contuorn ed intern dalla tuor, sco era las parts dils mirs giudem dalla tuor. La davosa etappa succeda igl onn **2015** cun la sanaziun dils mirs el sid dalla tuor e cun reparaturas dils mirs dalla tuor (cantunadas). Plinavon ha la fassada el sid retschiert ina pompusa entrada. Quella sanaziun ei mo stada pussevla cugl engaschi da Felix Nöthiger, il specialist da castials dil Grischun. L'entira sanaziun ha la finala custau rodund 250 000 frs. Sustegn finanziar ha il FcT retschiert dalla vischnaunca, dil Cantun e dalla Pro Castelis. La fianala han era numerus habitonts e numerusas habitontas, firmas ed uniuns susteniu grondisuamein il project.

Cun publicaziuns e guidas vul il FcT, en rama da TujetschVIVAcultura, far enconuschent alla populaziun e hosps la historia da quella ruina, dil casti da temps vargai.

### **Project actual**

ei la onstrucziun d'ina tuor da lenn sils existents mirs (tuor da protecziun).

L'execuziun vegn prida en vesta tenor stan dalla finanziaziun. Las lubientschas e damondas ein tuttas avon maun.

*Per igl onn 2025 ei previu*

- Fixar e marcar la senda al casti
- Tablas cun informaziuns
- Activar cun guidas
- Silla tuor ina bandiera cugl uoppen dalla famiglia de Putnengia/Tujetsch

### **Uoppen de Putengia = Uoppen da Tujetsch**

Igl uoppen dalla vischnaunca ei in ligiom restont cul casti e ruina da Putnengia. Igl onn **1939** ei la vischnaunca stada representada cugl uoppen dils de Putnengia alla exposiziun naziunala a Turitg. Cugl onn **1947** ei igl uoppen daventaus ufficials per Tujetsch. Igl uoppen original sesanfla ella sala da dertgira ella Cuort Ligia Grischa a Trun. Egl original ei la punt denter las duas tuors empau pli cuorta.

### **Intermezzos**

#### **Detgas en connex cul casti**

*La caura dad aur enasi Putnengia*

Ina sera da stgir miravan treis frars da Rueras orda finiastra e lura han ei viu ina caura dad aur che tarlichava sco ina cazzola si spel casti da Putnengia. Sin quei ein ei i per pigliar

ella, mo han viu nuot pli. - Quei era in scazi zuppau, ed ins stueva ver ina certa caussa per vegnir vitier.

*Il saczi da Putnengia*

Allas dudisch per Nadalnotg semuossa in custeivel scazi en la tuor da Putnengia; mo quel ei fetg grevs da survegnir, pertgei in sgarscheivel tgaun ner cun eglis da fiug sesa sin el.

*Las vaccas da Putnengia*

Ei fuva il di avon Sogn Placi, ch'in pur vegneva ina clara e biala sera en encunter Selva. Arrivaus dadens Dieni aud'el in grond scadenem da tiers. El mira giu e vesa entuorn las ruinas da Putnengia in rosch vaccas, che pasculavan per ils praus aunc buca fenai entuorn. Igl um saveva buca capir quei e vegn perquei en gronda tema. Spertamein va el a casa, mo cura ch'el ei lauter di turnaus orda Selva, vesa el per siu grond smarvegl ils praus da Putnengia en flur sco avon e negin havess encurschiu, ch'ei fuss stau en tiers.